

Zuoz disch finelmaing «schi» a Sanadura

La radunanza cumünela da Zuoz ho dit cleramaing da «schi» a la Sanadura, la nouva organisaziun per il provedimaint da sandet in Engiadin'Ota. Que cun 87 cunter 28 vuschs e que adonta cha'l cussagl cumünel vaiva spusto la decisiun ed arcumando düraunt las ultimas eivnas explicitamaing da niauncha enter i'l affer.

Sanadura «schi» u «na»? Quella dumanda ho ils ultims mais proco per bgeras discussiuns in Engiadin'Ota, impustüt illa vschinauncha da Zuoz. Zieva cha desch dad ün desch vschinaunchas vaivan già decis in chosa Sanadura – e que per part cun granda magiurited per – es uossa, scu ultima vschinauncha, sto Zuoz landervi.

In sia radunanza dals 8 avrigl, e cun 87 cunter 28 vuschs, ho finelmaing eir la populaziun da Zuoz dit cleramaing da «schi» a la nouva organisaziun pel provedimaint da sandet in Engiadin'Ota. E que melgrò l'arcumandaziun dal cussagl cumünel da niauncha enter i'l affer, e zieva cha'l cussagl ho explicitamaing e düraunt püssas eivnas fat frunt ad üna partecipaziun tenor cussagl cumünel «imponderada» a la Sanadura.

«Na» al cussagl cumünel

Üna da quellas persunas chi ho cumbattieu per spuster quista decisiun imponderada, es sto il president cumünel da Zuoz, Romeo Cusini. Invaunamaing ho el cun tuot las forzas pussiblas – eir auncha düraunt la radunanza – pruvo da persvader a sia populaziun. «Eau accept quista decisiun democratica. La populaziun ho vusch, però eir saviand inua chi sun las difficulteds per nouva vschinauncha in avegnir», valütescha Romeo Cusini il resultat güsta cuort zieva la radunanza cumünela a Zuoz.

Sieus argumaints e quels dal cussagl cumünel da Zuoz nun haun persvas. Nempe cha la vschinauncha da Zuoz hegia auncha memma bgeras dumandas aviertas in connex cun las



Las 117 votantas e votants da la vschinauncha da Zuoz haun cleramaing decis per la Sanadura e cunter il cussagl cumünel.

fotografia: Dario Müller

duos instituziuns, SGO – la fundaziun in procedura da concuors – e Sanadura. E ch'impü maunchan ouravaunt tuot las infurmaziuns necessarias davart il tema consequenzas finanzielas per la vschinauncha per alura piglier üna decisiun fundada in chosa.

Suot il strich però sun stos var trais quarts da la populaziun dad ün oter avis. E que sainza chi ho do grandas discussiuns düraunt la radunanza. Dime na as pudess fer la dumanda, schi ho insomma valieu la paina per tuot quist sforz. La decisiun paraiva nempe già dad esser tratta ouravaunt. «A vela adüna la paina da cumbatter per la chosa. Nus vains fat quista lavur our da persvasiun e perque nu sun eau neir brichafat dischillus da la decisiun. Forsa ch'eir la lojalited invers otras vschinaunchas ho cò giuvo üna tscherta rolla», sup-

puona il president cumünel püna-vaunt.

Üna decisiun chi fo plaschair

Fin l'ultim varon püs factuors mno a la decisiun. Po esser cha la gliעד saro steda simplamaing stüffa da la discussiun, ubain cha tschertüns varon gieu respet invers l'intschertezza in connex culla sgürezza dal provedimaint da sandet ed alura varo sgüra eir la solidarited u lojalited invers la cumünanza giuvo üna rolla.

Valüter la decisiun nu vuless auncha Andrea Fanconi, il president ad interim dal cussagl administrativ da la Sanadura. Ün di zieva la radunanza piglia el seguaintamaing pusiziun invers la FMR: «Eau nu vuless interpreter memma. Però nus pigliaims la decisiun cun grand plaschair per cugnuschentscha. Eau sun da l'avis cha que saja üna respunsabili-

ted cumünai vla da tuot la regiun da sandet. Perque sun eau fich cuntaint cha Zuoz fo uossa eir part da la Sanadura.»

Segns da dumanda eir in avegnir

Que chi vuless dir cha a partir da dalum paun decider tuot las vschinaunchas insembel cu cha que vo inavaunt cul provedimaint da sandet illa regiun. Ed apropro decisiuns in avegnir, cò accentuescha il president cumünel da Zuoz cha la tscherna per ün commember pel cussagl da sandet saja già instradada. Chi's tratta cò da duos candidatas u candidats pussibels dadour il ravuogl dal cussagl cumünel e dadour il ravuogl politic.

Chi cha que saja nu vuless Romeo Cusini in quist mumaint auncha tradir e concluda il discurs fand attent aunch'üna vouta a las sfidas finanzielas pella vschinauncha in avegnir. «Progets

per svilupper la vschinauncha da Zuoz, quels pudarons plaunet metter da la vart. Quist pass ho consequenzas finanzielas. Nus vains pruvo da musser ils prievels finanziels e quels vzaronsa alura a la prosma radunanza da büdschet in november. Que do nempe auncha oters plazzels da fabrica illa regiun chi haun eir lur predsch.» E perque spera e spetta Romeo Cusini pünavaunt cha la populaziun stetta alura eir in avegnir davous la decisiun chi'd es gnida tratta düraunt quista radunanza.

A tuotta via es la tematica da fer part a la Sanadura u brich, uossa definitivamaing e finelmaing giò d'maisa. Que chi resta però sun auncha bgeras dumandas aviertas in connex culla SGO e che chi capita alura per exaimpel cullas immobiglias da l'ospidel e las chesas da persunel a Samedan.

Dario Müller/fmr

Arrandschamaints

«Innsbruck retour» cun musica da barock

Sent In dumengia, ils 12 avrigl, ha lö a Sent ün concert fich special. Quista jada nun esa dad ir ad Innsbruck per cultura – Innsbruck vain nempe in Engiadina e quai per la seguonda jada daspö il 2023. L'ensemble da barock «klingueu» suna in

ün möd frisch e san. Lisa Weiss (sopran), Claudia Delago-Norz e Lukas Praxmarer (violinas), Anna Müller (violoncello), Domenico Cerasani (teorba) e Flora Fabri (cembaloE) preschaintan Ouvras d'Antonio Caldara (1670–1736): Trisonata da

l'opus 1 e 2, cantatas da chombra ed arias, tanter oter l'aria captivanta da Maria Magdalena cul nom, «Pompe inutili – Nutzlose Pracht». Quist concert grondius illa baselgia refuormada da Sent cumainza in dumengia a las 17.00. (protr.)

Bal per senioras e seniors

Zernez Las senioras e'ls seniors da la regiun sun invidats ad ün inscunter da bal e star da cumpagnia. Il prossem bal per senioras e seniors ha lö in sonda, ils 11 avrigl 2026, a l'hotel a la Staziun a Zernez. Per la musica da bal

piesser la Chapella GrischArt e quai da las 14.00 fin las 17.00.

Ils organisatuors invidan amiaivelmaing a tuots a star da cumpagnia, tadlar la bella musica e far ün per trais-chas. (protr.)

Imprender meglder rumantsch

Ostern	Pasqua
der Gründonnerstag	la Gövgja sencha / soncha
der Karfreitag	il Venderdi sench / sonch
die Karfreitagsliturgie	la liturgia dal Venderdi sench / sonch
die Karwoche	l'Eivna sencha / soncha
die Kommunion (cat.)	la comuniun (cat.)
der Kommuniionsunterricht	l'instrucziun da comuniun
die Kommunion empfangen (cat.)	artschaiver la (sencha / soncha) comuniun
der, die Konfirmand, -in (prot.)	il, la confirmand, -a
der Konfirmandenunterricht (prot.)	l'instrucziun da confirmands
die Konfirmation (prot.)	la confirmaziun
konfirmieren (prot.)	confirmer / confirmar

Romanische News
auf Deutsch lesen!

ÜBERSETZUNGSSERVICE FÜR ABONNENT:INNEN

Ausgewählte romanische Artikel übersetzen wir auf Deutsch. Diesen Service speziell für Abonnent:innen bieten wir online auf [engadinerpost.ch](https://www.engadinerpost.ch).

So funktioniert es: [engadinerpost.ch](https://www.engadinerpost.ch) aufrufen, einloggen, romanischen Artikel mit Übersetzungssymbol auswählen, deutschen Text anzeigen lassen.

Viel Freude beim erweiterten Lesevergnügen auf [engadinerpost.ch](https://www.engadinerpost.ch)!

Infos:

FMR FUNDAZIUN MEDIAS RUMANTSCHAS | Engadiner Post

Forum da votaziun

La Büvetta es plü gronda sco Scuol

Id es üna furtüna incredibla! A Scuol culan daspö millennis d'ons funtanas d'aua minerala our da la muntogna. Gratuit. Bleras regiuns giavüschessan quai, a Scuol es quai mincha di üna realitè. Scha las votantas ed ils votants van a l'urna ils 19 d'avrigl, decida il cumün politic da Scuol cun sias fracziuns Guarda, Ardez, Ftan, Sent e Tarasp, che cha quist regal vala. I's tratta da la Büvetta chi dà a las funtanas cun l'edifizi architectonic üna valur incumparabla i'l arch da las Alps. La Confederaziun ed il Chantun han realisà quista valur e curren ils cuosts per 80 pertschient. Las funtanas sun gratuitas, l'infrastructura

nun es quai. Cün ün schi o ün na nu decida il cumün na be davart il futur da la posiziun da l'aua sper l'En, mobain i va amo per bler daplä. Sco uniun «Graubünden aua» giavüschain nus cha'l Grischun stima sia furtüna d'aua e renda quai eir percepibel per il muond. La Büvetta ha üna forza da radiazium lösch sur l'Engiadina Bassa oura. Ella vegn percepida a San Murezzan, a Puntina, a Passau ed a Vienna ed ella vegn eir duida al Rain ed a la Maira. La valur da la Büvetta es impajabla – sco las funtanas svesa.

Ernst Bromeis
President società
Graubünden aua